

Remitido

Mi venganza contra Juby Naar

Sr. Redactor, mi ta spera cu na DIARIO lo no censura e remitido aki y lo no laga Sr. Juby Naar censura esaki tampoco, pasobra ta referi na su persona. Ta hopi decada a pasa cu mi kier a venga e abusonon cu el a comete contra mi for di tempo di scol y awor mi a haya e oportunidad pa haci esaki.

Nos a bay scol hunto, caba scol hunto, bay Lerarenopleiding hunto, y nunca Juby kier a permitimi hunga den ningun equipo deportivo.

Semper mi tabata mucho cortico, mi no ta sirbi pa tal posicion, mi no ta cla pa competencia y asina por sigui.

Mi mester admiti sinembargo cu e tabata tin razon pasobra nunca mi por a converti den un deportista pasobra mi no tabata sirbi pa ningun di e deportenan. El a usa mi si pa su comedianan den Don Bosco Club, Suriname Club y Cicilia Club. Pesey si mi tabata sirbi.

Awor despues di mas di 50 aña mi a bin haya sa ta kende ta culpable cu "inocentemente" mi a wordo kita di scol.

Algun siman pasa, mi tabata sinta na cas ta wak television y mi yiu muher tabata lesando. E no por a keda sin hari te cu el a cuminza traha riba mi nervio y mi a acerke.

E tabata lesando "copianan di prueba" di bukinan di Juby Naar cu un amiga a preste pa controla.

Mi curiosidad a bay asina leu di kier a sa kico Juby a skirbi y mi a hayami ta lesa e tres bukinan.

Mi a sinta hari mescos cu mi yiu muher a haci. Mi a hayami den periodo di scol cordando e bon tempo di scol. Mi a trata na busca afo ta cual "galifa" e tabata referi na dje den su storia di tur su "freinan". El a

ponemi hari y tenemi den suspenso pa sa con a para finalmente cu e aventura cu Sra. Tecla Kelly na Polonia, y tambe e storia "con spirito" a core su tras.

Juby a siñami masha hopi di cultura y historia bieu di Aruba, y na un manera agradable skirbi cu bo mester por lesa nan dos of tres biaha, locual mi a haci tambe.

Mi a siña di "mortonan" y e parti historico di deramento y a trecemi bek na mi tempo di mucha y joncuman hoben, ora cu tin "morto" etc..

Mi a siña di e casamentonan di antes, di nos frutanan y nos cuminda nan y tur di nan skirbi na un manera cu bo no ta pone buki abao prome cu bo caba di lesa.

Mi pensamiento a bay riba: "ta esaki nan mester siña nos muchanan na scol di nos historia".

Mi nunca tabata sa cu tabata tin tanto creencia na Aruba ni di e "culebra cu pia" ni di tanto creencia riba "dia di Diabierna Santo" y pa "amor, placa, y trecemento di suerte of mala suerte".

Mi venganza ta e remitido aki pasobra mi sa cu Juby lo no promove su buki riba su mes y asina aki mi por haci esaki sin su permiso pa gradici'e pa momentonan masha agradable cu mi a pasa lesando e 3 bukinan cu segun mi tin entendi ta wordo presenta e dianan aki.

Mi no ta lesador di buki, pero e bukinan aki a lanta un interes grandi pa lesamento di buki di nos autornan y mi ta spera cu pronto mi lo por lesa mas buki di bo. Asina interesante nan ta!

Mi no ta publica mi nomber pero si menciona "MoriJantje" e sa mes ora cu kende e ta tratando aki. Masha danki pa e espacio cu por ser concedi na

mi persona.

MoriJantje
Number y adres
Conoci na redaccion.

NOTA: Na DIARIO no ta censura remitido con cu ta y publicacion aki ta un prueba. "Moortje" mi ta contento cu

bo a haya sa "con mi a saca mi culpa for di un situacion precario y mester a usa bo" na scol te cu nan a kita abo. Lesando e remitido aki mi a ripara cu tog bo ta sirbi pa algo mas cu sirbi frèrenan cuminda 2 biaha pa dia.

Juby Naar.